

## Headlines

- 1 2024 दे लोकसभा चुनां 19 अप्रैल थमां 7एं चरणें च कराए जांगन, वोटें दी गिनतरी 4 जून गी होग।
- 2 जम्मू कश्मीर च लोकसभा चुनां 5एं चरणें च होंगन। चुनां आयोग नै जम्मू कश्मीर च विधानसभा चुनां ते लोकसभा चुनां किट्ठे कराने थमां इंकार कीता।
- 3 प्रधानमंत्री नरेन्द्र मोदी होरें आकखेआ ऐ जे भ्रष्टाचार खलाफ उंदी लड़ाई च कुसै बी भ्रष्टाचारी नेता गी बख्शेआ नेई जाग।
- 4 कांग्रेस नेता राहुल गांधी होरें आरोप लाया ऐ जे चुनां बांड स्कीम इक बसूली गिरोह ऐ जेहड़ा सरकारें गी पलटने लेई बरतेआ जंदा ऐ।
- 5 चीफ ऑफ डिफेंस स्टाफ जनरल अनिल चौहान होरें आकखेआ ऐ जे पाकिस्तान च आर्थिक बदहाली दे बावजूद ओहदी फौज साढ़े आस्तै चुनौती बनी दी ऐ।

<><><><><><>

## Lok Sabha Polls

लोकसभा चुनां अगले म्हीने दी 19 तरीक थमां 7एं चरणें च कराए जांगन। मतगणना इस ब'रे 4 जून गी होग। पैहले चरण च 19 अप्रैल गी 102 लोकसभा सीटें लेई, वोट पांगन। दुए चरण च 26 अप्रैल गी 89 सीटें लेई, त्रिए चरण च 7 मई गी 94 सीटें आस्तै, चौथे चरण च 13 मई गी 96 सीटें आस्तै, 5में चरण च 20 मई गी 49 सीटें आस्तै, 6में चरण च 25 मई गी 57 सीटें आस्तै ते 7में ते खीरले चरण च पैहली जून गी 57 लोक सभा सीटें आस्तै वोट पांगन। मुख् चुनां आयुक्त राजीव कुमार होरें लोकसभा चुनां ते किश राज्यें च विधानसभा चुनां दी राज्यें च विधानसभा चुनां दी तरीकें दी घोषणा करदे होई आकखेआ जे भारतीय चुनां आयोग दी टीम, देश दे लोकतंत्र दे सब्बने शा बड्डे उत्सव लेई पूरी चाल्ली तैआर ऐ। उनें दस्सेआ जे देश च 97 करोड़ पंजीकृत मतदाता न जिंदे च 49.7 करोड़ महिला मतदाता शामिल न ते साढ़े 10 लक्ख मतदान केन्द्रें पर डेढ़ करोड़ कर्मी तैनात होंगन। उनें दस्सेआ जे इक करोड़ 82 लक्ख मतदाता पैहली बारी वोट पांगन ते 25 ब'रे शा बद्ध उमर आले ते दिव्यांग वोटरें लेई घर बैठियै वोट पाने गी जकीनी बनाया जाग। वर्तमान लोकसभा दा कार्यकाल इस ब'रे 16 जून गी संभा'रदा ऐ।

<><><><><><>

## JK Polls

जम्मू कश्मीर दे 5 लोक सभा हल्के च 19 अप्रैल, 25 अप्रैल, 7 मई, 13 मई ते 20 मई गी 5एं चरणें च मतदान होग। चुनां आयोग नै विधानसभा चुनां ते लोकसभा चुनां किट्ठे कराने थमां इंकार कीता। मुख् चुनां आयुक्त होरें आकखेआ जे शड़े 4 राज्यें सिक्किम, अरुणचल प्रदेश, आडिशा ते आंध्रप्रदेश च गै दवै चुनां किट्ठे कराए जा'रदे न। उनें दस्सेआ जे जम्मू कश्मीर च विधानसभा चुनां, लोकसभा चुनां दे बाद च होंगन, कीजे दवै चुनां कन्नै कराना सुरक्षा दी दृष्टी कन्नै ठीक नेई ऐ ते पूरे देश च चुनां दे चलदे जम्मू कश्मीर च हर इक मेदवार गी सुरक्षा उपलब्ध कराना संभव नेई ऐ।

<><><><><><>

## PM-Congress

प्रधानमंत्री नरेन्द्र मोदी होरें अज्ज आकखेआ ऐ जे भ्रष्टाचार खलाफ लड़ाई च कुसै बी भ्रष्ट नेता गी बख्शेआ नेई जाग। उनें आकखेआ जे परोआरवादी राजनीतिक पार्टिं च भ्राह्-भतीजावाद, भ्रष्टाचार ते तुष्टिकरण दा इक सांझा इतिहास होंदा ऐ। अज्ज तेलंगाना दे नगर कुरनूल च इक बड्डी जनसभा गी संबोधत करदे होई प्रधानमंत्री होरें बीआरएस ते कांग्रेस दी निंदेआ

कीती ते आक्खेआ जे इनें परोआरवादी पार्टिएं, देश गी तबाह करने दा कम्म कीता। प्रधानमंत्री होरें राज्य दे लोकें गी जकीन दोआया जे दफा-370, श्री राम मंदर ते नेयी होरनें केई चीजे आला लेखा गै उंदे कन्नै कीते गेदे सब्बनें वायदे गी बी पूरा कीता जाग। प्रधानमंत्री होरें औंदे लोकसभा चुनाएं च तेलंगाना दे लोकें दा सैहयोग मंगेआ ते आक्खेआ जे ओह बिजन चिर लाए दे उंदे सब्बे मसले हल करी देंगन।

<><><><><><>

### Centre Ban

केन्द्र सरकारै जम्मू कश्मीर पीपुल्स फ्रीडम लीग ते ओहूदे सब्बनें गुटे गी अगले 5एं बरें लेई गैर कनूनी संगठन घोषत करी दितता ऐ। एहूदे अलावा केन्द्र सरकार नै जम्मू कश्मीर लिब्रेशन फ्रंट-जेकेएलएफ दे मोहम्मद यासीन मलिक गुट पर बंदिश गी बी होर 5एं बरें लेई बघाई दित्ता ऐ। केन्द्री गृहमंत्री अमित शाह होरें सोशल मीडिया मंच-एक्स पर इस फैसले दी घोषणा कीती ते आक्खेआ जे आतंकवादी गतिविधिएं च शामिल लोकें ते संगठनें गी मोदी सरकार कुसा कीमत पर नेई बख्शोग। शाह होरें आक्खेआ जे एहू संगठन आतंकवाद दे राएं जम्मू कश्मीर च अलगाववाद गी बढ़ावा देइयै भारत दी अखंडता लेई खतरा बने दे न। गृहमंत्री होरें आक्खेआ ऐ जे मोदी सरकार आतंकवाद गी जड़ थमां पुट्टी सुट्टने लेई वचनबद्ध ऐ।

<><><><><><>

### Intruder

राजौरी जिले च नियंत्रण रेखा पर अज्ज इक 34 बरें दे पाकिस्तानी घुसपैठियै गी हिरासत च लैता गेआ। सरकारी सूत्रें मूजब नौशेहरा सेक्टर च सेना नै पाकिस्तान अधिकृत कश्मीर दे समानी ग्रां दे मोहम्मद नदीम गी फगड़ेआ, जेहड़ा कल संजा बन्ना टपियै भारतीय इलाके च दाखल होआरदा हा। पाकिस्तानी घुसपैठियै गी गिरफ्तार करियै ओहूदे शा पुच्छ-पड़ताल कीती जा'रदी ऐ।

<><><><><><>

### SVEEP Reasi(byte)

रियासी जिला प्रशासन नै स्वीप अभियान तैहत नोजवाने गी औंदे लोकसभा चुनां च उत्साह कन्नै हिस्सा लैने लेई प्रेरित करने आस्तै इक राफिटंग आयोजन कराया। जिला चुनां अधिकारी विशेष महाजन होरें राफिटंग च हिस्सा लैता ते लोकें गी खास तौर पर नोजवाने गी मतदान करने लेई आक्खेआ। आकाशवाणी संवाददाता कन्नै गल्लबात च उनें अपने बचार प्रकट कीते

<><><><><><>

### Congress Rahul

कांग्रेस नेता राहुल गांधी होरें अज्ज बीजेपी नेतृत्व आली केन्द्र सरकार पर हमले गी तेज करदे होई चुनावी बांड स्कीम गी, सरकारां पलटने ते सियासी पार्टिएं गी जोड़ने दा इक माध्यम दस्सेआ। महाराष्ट्र दे थाने च जंभाली चाका थाहर अपनी भारत जोड़दे न्याय यात्रा च उनें आरोप लाया जे चुनां बांड स्कीम इक अंतर्राष्ट्रीय स्तर दा वसूली गिरोह ऐ जेहदा विरोध करने पर ईडी, सीबीआई ते आयकर विभाग पिच्छे लाई दित्ते जंदे न। उनें आक्खेआ जे सरकारी ते निजी खेत्तर च आबादी दे 80 फीसद हिस्से दी नुमांयदगी बड़ी घट्ट ऐ, जेहूदे च पिच्छड़े तबके, दलित, आदिवासी, अल्पसंख्यक शामिल न।

<><><><><><>

### CDS

चीफ ऑफ डिफेंस स्टाफ जनरल अनिल चौहान होरें आक्खेआ ऐ जे पाकिस्तान अज्ज भामें आर्थिक बदहाली दा सामना करा करदा ऐ पर ओहूदी फौजी समर्थ ते थेआरबंद बल अजे बी भारत लेई चुनौती बने दे न। "राष्ट्री सुरक्षा: भारती सेना अग्गे मजूद चुनौतिएं" आले विशे पर आयोजित गल्लबात आले इक कार्यक्रम दरान बोलदे होई जनरल चौहान होरें आक्खेआ जे भारत कश ऐसे संसाधन ते समर्थ मजूद ऐ जिंदी बदौलत अस अपने बन्नें खास करियै उत्तर भारत च विवाद आले बन्नें दी सुरक्षा जकीनी बनाइ सकने आं। 21मीं सदी च भारत अग्गे मजूद चुनौतिएं बारे पुच्छे गेदे इक सुआले पर प्रतिक्रिया दिंदे होई जनरल चौहान होरें आक्खेआ जे सब्बनें शा बड्डी चुनौती बाहरै थमां ऐ पर देश ओहूदे कन्नै निबड़ने लेई पूरी चाल्ली इकजुट ऐ। उनें आक्खेआ जे भारत दे दो गवांडी मुख्य न जेहूड़े साढे प्रति दुश्मनी दा भाव रखदे न पर भारती फौज इस किस्मे दिएं चुनौतिएं ते खतरें कन्नै निबड़ना खरी चाल्ली जानदी ऐ।

<><><><><><>

## LG-J&K

उपराज्यपाल मनोज सिन्हा होरें आक्खेआ ऐ जे अज्ज जम्मू कश्मीर प्रभावशाली रफतार कन्नै विकास करै करदा ऐ ते केई खेत्तरें च सकारात्मक बदलाव आवा करदे न। नमीं दिल्ली च श्री राम कालेज ऑफ कामर्स पास्सेआ आयोजित बिजनेस कनक्लेव 2024 गी संबोधत करदे होई श्री सिन्हा होरें आक्खेआ जे दफा-370 गी हटाए जाने दे बाद जम्मू कश्मीर लोकें दिएं आसैं-तांगें गी पूरा करने लेई तेज रफतार कन्ने विकास बाद्धे ते सकारात्मक बदलावें आली इक यात्रा पर अगड़ा बधी पेदा ऐ। उनें आक्खेआ जे पूरे पराते विकास लेई प्रशासन दी वचनबद्धता नै कमजोर वर्गे, नोजवानें, महिलाएं ते करसानें लेई साजगार माहौल बनाया ऐ जेह्दे च ओह् अपनी असल समर्थ दा पूरा-पूरा लाह् हासल करी सकगंन।

<><><><><><>

## Dairy Automatic(byte)

रामबन दे पशुपालन विभाग नै डेयरी फार्मिंग दे एंग तरीके च सुधार आनने लेई दौं आधुनिक स्वचलित दुध किअ्ठा करने आली इकाइए गी व्यापक कृषि विकास कार्यक्रम एचएडीपी तैह्त शुरू कराया। रामबन दे आकाशवाणी संवाददाता कन्नै गल्लबात च मुख् पशुपालन अधिकारी होरें मती जानकारी दित्ती.....बाईट

<><><><><><>

## Kishtwar Tourism(byte)

किश्तवाड़ जिला प्रशासन नै जिला रोजगार विभाग कन्नै रलियै एवीएसएआर स्कीम तैह्त टूर ओपरेटर होम स्टे मालकें, होटल ते दुए पर्यटन कन्नै जुड़े दे उद्यमिं लेई इक हफ्ते दे जागरूकता कार्यक्रम दा आयोजन कीता, तां जे उनेंगी पर्यटन उद्योग कन्नै जुड़ी दी सिखलाई दित्ती जाई सकै। किश्तवाड़ दी जिला रोजगार अधिकारी ममता सुदर्शन होरें आकाशवाणी संवाददाता कन्नै इस बारे गल्ल कीती

<><><><><><>

## Udhampur NYK(byte)

उधमपुर दे नेहरू युवा केन्द्र आस्सेआ नशा मुक्त भारत तैह्त गौरमैट कालेज फॉर वूमैन दी एनएसएस इकाई दे सैह्योग कन्नै Neighbourhood Youth Parliament दा आयोजन कीता गेआ। डिप्टी कमीशनर सलोनी राय आईएस होरें समारोह् दी अध्यक्षता कीती ते नमें वोटरें गी नां दर्ज कराने ते सब्बनें गी चुनां प्रक्रिया च शामिल होने आस्तै प्रेरित करने लेई आक्खेआ। आकाशवाणी संवाददाता कन्नै गल्ल करदे होई डीसी उधमपुर ते इक विद्यार्थी नै अपने बचार प्रकट कीते..... बाईट

<><><><><><>